

四庫全書

集部

欽定四庫全書

集部

襄毅文集卷

六

詳校官庶吉士<sub>臣</sub>陳若霖

中書<sub>臣</sub>劉源溥覆勘

總校官檢討<sub>臣</sub>何思鈞

校對官侍詔<sub>臣</sub>胡士震

謄錄監生<sub>臣</sub>丁國華

欽定四庫全書

襄毅文集卷六

明 韓雍 撰

七言律詩

酬同年白亞卿宗玉

三邊多事客憂深  
天上東風送好音  
念我有情如對語  
喜君無恙欲狂吟  
萬金肯易平安字  
四海誰同故舊心  
南望燕山隔千里  
未知何日會朝簪

送夏大理歸省其母壽九十六月二十一初度明

日立秋

綵衣仙子下青雲拜舞堂堂喜氣新時近新秋先一日  
歲周花甲又三旬羅輕疊雪恩袍麗杯滿流霞壽酒醇  
積善從來享遐福加封還擬荷絲綸

宜軒詩為鄉人郭士忠題

一門和氣致豐盈築得幽軒分外清詩酒琴棋皆適意  
風花雪月總忘情世間塵事隨時應林下高蹤信步行

何日投簪歸舊隱扁舟來此濯塵纓

辛巳五月望日與宣府鎮守太監王公受總戎都督陳公友西出巡邊有作

曉分旗鼓向邊陲路轉羊腸信馬馳烽堠千尋明遠近  
塞垣一道界華夷崇山峻嶺藩屏固良將雄兵陣勢奇  
已喜皇威振沙漠天驕寧敢更南窺

雙節堂為御史朱鉉題

其伯母母俱守節

同揮清淚落重泉荀采中情晚不遷湘水未沉因有子

金史四庫全書  
卷六  
首陽終餓為無天鴈鴻叫雨離羣遠松栢凌霜出類堅  
節義從來關世教願將女範續新編

五月二十九日登鎮朔樓避暑

鎮朔樓高壯國威偶來避暑駐驂駢萬家矮屋碁分局  
四面崇山翠作圍風引雲霞常入座天生冰雪便侵衣  
狼煙已息邊塵遠王化于今遠近歸

登雲中城西北樓次古詩韻

天風吹我上層簷望入中邊逸興添草暗黃沙迷遠近

山連紫塞見毫纖籌邊自愧李德裕憂國誰如范仲淹  
耐此高寒屬吾輩不須重掛却寒簾

寄謝撫寧伯惠弓兼頌德美寓懷思三律

時撫寧  
總戎備

邊

良弓新賜專征伐分惠書生意最優稱手開弦秋月滿  
向空發矢曙星流貫鵬敢在轅門射破敵期隨驥尾遊  
白壁黃金酬未得題詩遙寄重回頭

將畧家傳能不忝貂蟬行裏羨君優忠勲信是無雙士

才望何慚第一流中外傳聞常共仰君臣行見慶同遊  
好將一段匡時策歸去敷陳玉殿頭

分手宣城纔幾日暮雲西望客情優異鄉況是參商隔  
兩地空嗟歲月流此際題詩天外寄何時秉燭夜中遊  
丈夫遭際應圖報莫遣相思變黑頭

褒旌堂為朱御史題

孀居教子已登庸白髮光華寵數重龍繞朱門初表異  
鸞迴紫誥復推封共姜自古傳貞節孟母于今見德容



二美能全天下少為題詩句勸三從

遊雲中下寺

邊庭無事簡書稀偶到僧房暫息機  
殘雪江山驚歲暮紅塵蹤跡與心違  
且傾尊酒消愁悶莫向羣公論是非  
自古忠臣報明主只將三尺播皇威

春日與一二知己小酌次趙倚樓憶山陽詩韻

忽傳春信到天邊猶見河山積雪連  
賞節已開鈴閣燕懷人休棹剡溪船  
詞翻彩筆傾三峽酒泛瑤杯吸百川

暫解羈愁莫相笑東風回首又新年

迎春有感

簫鼓迎春春意嘉偶聞春至却咨嗟空看鴈雪呈新瑞  
不見寒梅放好花鄉信何曾來鴈足萍蹤尤自在天涯  
且拚杯酒消愁悶自古忠臣不顧家

春日小酌和杜荀鶴雪韻

塞外逢春春意生江山風景最分明半消殘雪騰寒氣  
將泮流澌露水聲壯志肯教孤寵眷菲才何以佐承平

人生嘉會從來少莫厭尊前酒再行

自憐昏瞶度浮生忽報春來覺漸明雪壓亂山秦塞影  
風傳刁斗戍樓聲每懷南國愁無限未減西戎恨不平  
淺薄將何報明德願騎驄馬謾巡行

解嘲寄林同寅

欲將直道輔明時誰信公行反作私薄行任從羣小謗  
素心應有鬼神知宦途歲月空衰老鄉國風光苦夢思  
何日酬恩便歸去天倫堂上聚金卮

兩使雲中為秦行人民悅題

芳年登第列清班每誦皇華不少間藩府再銜綸綍至  
平城重送旆旌還謾嗟出塞勞王事便喜趨朝覲聖顏  
我亦懷歸歸未得臨風誰忍唱陽關

紫薇精舍為陸主事孟昭題

其地范忠宣公別業舊號紫薇村今孟昭卜為先壠  
故作精舍植紫薇以此名之不忘本也

精舍初開近壽藏就中風景有紅芳絲綸閣下傳來種

虛白堂前醉後妝宿草一杯侵艷色真檀幾炷和清香  
名山從此增光價應賴宣公為顯揚

輓楊尚書

滇南江右著華勲八座連登不愧心叔達讜言扶社稷  
樂天高節在山林一簪白髮俄觀化四海蒼生絕望霖  
我忝相知重傷感紫陽南望淚沾襟

春日與總兵楊公謁玄帝廟因散步玉虛觀楊具  
酒小酌和杜工部早朝詩韻

尋春駐馬玄都觀不見當年千樹桃  
滿地松陰隨日轉繞樓山色入雲高  
籌邊正擬行多筭壯國寧容挫一毫  
有待天風起鵬鵠也陪霄漢展鴻毛

贈楊總兵

今代勲臣誰第一征西才畧古人同  
名聞中外裴丞相身係安危郭令公  
萬里長城恒庇國千尋孤柱獨擎空  
天驕從此無南下還擬趨朝總八戎

發雲中將之宣城至陽和奉勅送敵使出境因復

回轅悵然有作

漠漠平沙路幾程東行未遠又西行馬頭山雀飛還落  
雲外邊烽晦復明宦海萍蹤何日定吳江鷗侶幾時盟  
愁來苦憶陶彭澤得向田園老此生

昨與鎮守總戎諸公訪學士倪先生言及被誣往  
事諸公為之一慨因奉近體一詩慰之

欲將直道塞權門豈意豺狼即噬吞白壁蒼蠅雖少玷  
皇天后土也知冤風霜正是成高節日月終須照覆盆

善惡于今報尤速好開懷抱迓殊恩

次韻酬倪學士

窮鱗點額下龍門歸怨河神恨欲吞羣黨忍心平嫁禍  
斯文揮淚惜銜冤長沙才子謾題賦東坡道人休照盆  
四海蒼生正翹首還朝端儼拜王恩

曾揮綵筆歷金門蓬島雲霞恣吐吞自負直誠無愧怍  
誰知奸惡致讐冤漫嗟鳴鳳空巢閣未許降龍久在盆  
天意憐才故勞困儼成大器晚承恩



叨陪介冑坐轅門壯氣思將瀚海吞已喜三軍皆樂業  
忍看孤客獨含冤未承京國徵賢詔且飲田家老瓦盆  
自古名流遭橫逆幾多垂老復霑恩

暇日與倪學士羅郎中飲蕭寺中和李白詩韻二  
首

幽堂宴集謝東君文字歡娛世罕聞綵筆每揮華翰出  
新詩不用舊題分巢歸宿鳥喧秋樹山沒斜陽起暮雲  
美景良辰莫虛負行人明日又離羣

兩鎮旬宣荷聖君却慚勲業老無聞  
邊烽烟火猶相接宵旰憂勤未得分  
魯酒幾巡催落日商歌一調遏行雲  
座中狂客休誇大學士才華自不羣

秋夜雨有感言懷二首

客裏逢秋感已深  
可堪秋夜對秋霖  
江湖未遂希文志  
丘壑空懸永叔心  
雲壓戍樓迷畫角  
風傳警枕亂清砧  
誰憐懷國思鄉處  
無限愁腸自苦吟

蕭蕭浙浙更悠悠  
積雨聲中起百憂  
塵世浮名成底用

異鄉孤客尚淹留雅懷豈羨笙歌夜短髮深悲草木秋  
何日酬恩便歸去吳淞江上伴眠鷗

送王進士

布得新恩到朔方匆匆歸去別情長喜君操行真無玷  
老我斯文重有光滿路霜風吹客旆一天寒月照詩囊  
從來科目多豪傑好聲忠誠答聖皇

天順八年春正月晦日子被人傾擠出為浙藩參政  
脫險途遷美秩又得便道歸覲老親心甚樂焉遂買

舟南行二月望日舟次磚河阻風偶成書感一律奉  
寄同窓師友山東大參簡菴王先生

出參行省百憂寬  
咲解金魚上木蘭  
半世萍蹤纔定跡  
八旬椿壽得承歡  
不愁月暗趨朝晚  
縱使風狂到處安  
獨坐蓬窓自深感  
報君惟有一心丹

至德州約簡菴不偶寄贈一律

滿擬相逢握手分  
不圖車騎已東巡  
泰山空望魯邦晚  
衛水自歸滄海春  
喜我已辭名位險  
作官復得故鄉鄰

秋風如遇南來鴈好寄緘書慰散人

涵碧亭為鄉人郭宜軒賦

誰構幽亭近水濱  
宜軒高致自無倫  
波光萬頃映天色  
茅屋數椽無市塵  
樵唱漁歌孤棹晚  
野花間草四時春  
我來痛飲非無意也  
擬江湖作散人

送莫別駕之袁州

握手離亭酒漫傾  
送君南去佐專城  
帆開浙水孤舟遠  
路指宜陽別駕輕  
素有清名如白璧  
豈無惠政及蒼生

西江父老如相問  
衰朽江湖亦有情

送憲友陸掌教之柘城

少年同志雲霄路  
命蹇憐君獨後期  
太學久推淹美士  
中州今喜得賢師  
函開黃卷傳心處  
座擁青衿問道時  
樂育功成報明主  
還應高步鳳凰池

贈羅郎中還京

久司財賦駐平城  
經理才高綽有聲  
足食幾年增士氣  
銷兵隨處務農耕  
花迎紅錦添歸興  
酒盡青山動別情

明向彤廷奏邊計喬遷應荷聖恩榮

贈馬郎中還京

青青邊柳拂宮袍粉署人歸意氣豪  
三載已勞經濟畧一心無忝雪霜操  
杯殘客舍離情遠馬度關山健步高  
指日趨朝覲明主喬遷應荷玉音褒

貞節堂為王憲使允題

其母受封  
復旌表

白髮孀居教子勤子成名顯拜重恩寶  
函新賜雙龍誥金扁高題馬門晚歲孤  
松耐霜雪中秋華月照乾坤

共姜孟母休專美從此聯芳衍後昆

西湖舟中壽郭用行五十三

八月十九日

縹緲笙歌擁畫船慶君五十又三年西湖風月中秋好  
南極光輝昨夜偏誰道山中無宰相古來地上有神仙  
從今遐算應難計長似東流水一川

送徐裕軒

故人新置木蘭舟掛却蒲帆作勝遊四海交游同愛慕  
五湖風月任淹留吳山聽雨秋開閣浙水觀潮暮倚樓



暫得相懽又相別靈巖東望起深愁

送陳梅軒先生

豸錦烏紗不老仙間來西浙覽山川風神絕似難兄美  
慶澤鍾於令子賢對酒未聽天竺雨孤帆又掛剡溪船  
明朝愁向桐鄉別回首三吳月滿天

同邢太守趙伯顯遊三茅觀

清江潮落午風恬與客憑高試捲簾吳越羣山如繪畫  
乾坤萬物見洪纖旬宣遠慕台公與憂樂還思范仲淹

倚遍闌干不知晚五雲縹緲注遐瞻

同葉都憲遊淨慈寺

何處禪林是淨慈蘇公隄畔影參差水光山色有多景  
天下人間無此奇老我登臨方遂願高僧延欸索題詩  
國恩未報空遊樂笑撚霜毫有所思

同錢翰林遊寶叔寺和同年張太僕韻

羣山佳處偶來登峭壁奇峯似劒稜疎雨落潮聲隱隱  
淡雲芳樹影層層遙瞻親舍恒惆悵未報君恩益戰兢

草草題詩寫高興翰林風月我何能

弓都閭招宗陽宮會飲和錢學士韻

仙家深處綺筵開旋埽塵埃闢草萊  
一勺寒泉清見底萬竿晴竹翠成堆  
恍如白日遊瓊島疑似紅雲捧玉臺  
暫得懽娛感君賜欲圖報稱愧樗材

七月六日與寅友登紫微樓小酌和雷大參韻

蟬噪夕陽殘暑天高樓同上思茫然  
幾株古樹當窓外一帶吳山在目前  
知命已甘居草野置身不覺到峯巔

酒闌莫道休衙晚醉眼猶思望日邊

高樓一目盡吳天撫景題詩獨悵然功業敢誇猶在後  
聰明已愧不如前思鄉欲歛江湖跡避暑期登泰華巔  
翹首不堪心事切迢迢親舍白雲邊

瑞竹詩為蘇庠張司訓憲題

哀哀血淚滴重泉化作琅玕出道邊負土宗生真並美  
泣林孟氏漫稱賢人言定許孫枝盛天道應憐孝節堅  
奇瑞昭彰見風化我煩太史續新編

西湖餞別瞿中書次錢學士韻三首

亂蟬聲裏報新秋與客携壺上綵舟  
銜詔還鄉真寵命却金歸國豈常流  
四山芳樹迎紅錦一棹滄波起白鷗  
後夜相知重相憶夢飛先到帝王州

尊酒樓船喜會同可人佳景在湖中  
明珠衮衮芰荷雨翠浪飄飄楊柳風  
鳳閣豈能淹俊傑錢塘自古盛英雄  
好驅四牡趨朝去莫待霜林葉盡紅

涼雨初收九夏炎竹亭燕坐喜安恬  
湖山笑我來遊晚

風月因人到後添已覺功名慚召伯豈誇詞賦逼江淹  
酒酣不覺乾坤大俯視吳山一髮纖

遊淨慈寺次錢學士韻

勝境分明是洞天偷閑試問上乘禪老僧出定驚相訝  
見我來遊喜欲顛翠竹萬竿圍客座白鷗數點傍漁船  
品題賴有文章伯留得明珠顆顆圓

湖山舊隱為錫山錢津賦

遁跡湖山幾世同湖山移在故園中畫圖不假丹青筆

疏鑿真如造化功孤阜未荒和靖業釣臺常仰子陵風  
逸民自古關風教採錄重煩太史公

迎親道中得報喜而有作

時寓浙之石門

畫舫迎親秋色中行行長望極吳東白雲漸覺孤飛近  
青鳥先將喜事通但擬承歡過百歲不須加爵到三公  
平生至願于今遂感激皇恩造化同

觀潮

日日寒潮度海門潮頭高下與誰論乾坤元氣時升降

吳越長江任吐吞千里還驚雷電過半空常訝雪山奔  
人間壯觀無逾此我得遊觀感聖恩

慶謝方伯六十三

甲申九月十日

文犀宮錦照華顛晚景風流似列仙節過重陽纔一日  
歲周甲子又三年實郎丹桂家聲繼召伯甘棠官迹傳  
從此遐齡應不老廟廊高位看喬遷

遊雲居菴次錢學士韻

乘間同謁梵王居滿眼風光畫不如四面好山凌碧落



一窓修竹稱清虛  
蘇公丘壑情偏放  
范老江湖心暫舒  
和罷陽春人盡醉  
不知身世在堪輿

遊勝果寺

其地宋  
宮舊址

萬松夾道引肩輿  
鳥道登登上碧虛  
吳地江山如繪畫  
宋家宮闕已丘墟  
風光滿眼人難遇  
歲月無情鬢易疎  
莫向尊前問名利  
從來造物有乘除

慶鄭大參得二子

先已有一子

多君陰德感穹蒼  
錫胤還看屢降祥  
夢卜熊羆同獻吉

芽生蘭芷共飄香秦公纔見三堯喜竇氏休誇五桂芳  
我昨聞啼識英物他年定擬接飛黃

陳太常西湖別墅燕集

郭外茅堂近水涯仙翁置酒會朋儕四時花木春長在  
一片湖山秋更佳總羨太丘多樂事漫言文正有憂懷  
飲酣不覺歸來晚滿眼西風望泰階

食薺有感二首

十月江南天未霜蒙茸野薺滿園荒旋呼童子尋根摘

便付庖人入鼎嘗薦酒漫誇蒲笋嬾調羹殊勝韭芽香  
居間茹美皆君賜補報無能感意長

宦轍驅馳二十霜遷官今喜到南荒消閒遂我吟詩興  
取樂留賓索酒嘗微省漫言勲業減金甌誰覆姓名香  
食前方丈成何用不若貧家菜味長

題紫陽菴

怪石巉巖削未成紫陽風景十分清顛厓有路雲常護  
陰洞無人草自生白練橫江潮浪湧翠屏隔岸越山晴

金匱要略卷六  
我來登覽情懷遠直上峯頭望帝京

贈修實錄沈進士

遠持使節下錢塘科目人才自異常造化功能勞採錄  
山川人物仰輝光滿船明月吟邊趣夾道梅花到處香  
指日還朝應顯擢好輸忠蓋佐虞唐

壽酬白司空夢中與予接談懽甚之作

半生宦轍賴提携況復勞君入夢思丘壑只懸投老計  
雲霄敢望故人私緘詩寫恨空傳信尊酒論文未可期

安得微軀生羽翮  
天風吹送拜堦墀

遊玄妙觀

仙家樓閣枕吳山  
與客登臨一解顏  
似覺風神遊閬苑  
不知身世在塵闌  
天開圖畫蒼茫裏  
人醉壺觴紫翠間  
過客紛紛莫相笑  
宦途能得幾時閒

遊星宿閣

仙家高閣倚空青  
與客登臨醉眼醒  
簷際夜燈分列宿  
檻前曙景對疎星  
江湖衆水朝滄海  
吳越羣山繞翠屏

六合茫茫春望遠五雲多處是明庭

芝軒為陳汝宏題

相君德重子賢良天產靈芝滿畫堂一本九莖真可比  
三旬兩秀信非常漫勞綺皓歌商嶺絕似涪翁紀瑞昌  
感召因人見王化千年門第有輝光

成化元年二月四日早在浙藩官廨得驛報使者  
齎勅旨進予復官都臺統師征兩廣先一日與二三  
知己遊西湖晚歸醉卧驚覺聞此感而有賦因以

自警不計其辭之俚也

曉雞聲裏酒初醒  
忽報天書到驛亭  
妻子驚聞猶未信  
賓僚迎候已無停  
投閒自儼終衰朽  
任重誰期荷寵靈  
從此湖山又無分  
且將勤苦答朝廷

趙伯顥別駕迎師九江一見懽甚陪款旬日別去  
因贈二詩道予志兼東翁方伯林憲使舊友

遠統王師過九江  
勞君候我碧油幢  
幾回夢想何時見  
一見心從此日降  
舟次匆匆分別駕  
樽前草草叙同窓

凱還有待來春後重儼聯珂會帝邦

雄兵百萬沂長江鼓吹喧闐導羽幢五嶺只期明日度  
三苗應是望風降天連楚水青於靛船過廬山翠入窻  
寄語相知藩臬長好傳書札到南邦

趙伯顥以詩贈別次韻奉答

舟發長江浪已恬天公應為戒飛廉三湘近接無多路  
五嶺遙看只一纖忝我提兵真欲奮如君佐郡豈能淹  
相逢不是耽歡樂見說蒼生也具瞻



次長沙贈王彥卿司馬

脫冕歸休懷抱開十年林下避塵埃  
非關盛世遺良弼自是時人忌俊才  
綠野未容裴度老蒼生終望謝安來  
昨宵舟次星沙上已見祥光動上台

再次韻奉彥卿

欲再會  
不遂耳

暑雨霏微天未開萬艘泊處淨無埃  
長沙有客能經國舉世何人解惜才  
咫尺間居千里隔相將恩詔一時來  
嗟予重有同升願夜夜勞神望上台

次韻答李司馬用初二首

古道休談陳與雷高情今也惜非才  
風塵嶺表心應念雲樹江東首重回  
奏凱只須閒裏聽流光何惜暗中催  
丈夫有志輕離別常咲曹公賦七哀

恨賊非因世相韓明時何事起爭端  
秋霜定壓窮荒瘴春氣終回大谷寒  
薏苡漫勞疑馬援蓴鱸正爾憶張翰  
年來榮辱都看破准擬功成便棄官

贈別鍾職方鼎

遠統王師伐叛夷，犒師深喜是心知。  
聯舟一月多談笑，解纜明朝又別離。  
嶺表風塵君莫慮，江東雲樹我常思。  
凱還有日重相會，應說懽情勝舊時。

次趙征夷韻送焦員外

相逢一笑鳳凰臺，萬里長江並棹來。  
賜勞能宣明主惠，變通真是濟時才。  
驛亭樽酒辭清曉，使者星光接上台。  
當道如詢嶺表事，皇威定欲翦荒萊。

送孟主事淮

相門才子似君稀  
將命南來更有輝  
百萬王師供餉足  
五千客路拂衣歸  
鳳毛迎日紅雲近  
馬足行空紫電飛  
世祿如君真不忝  
好摠忠蓋答彤闈

祁陽道中次韻三首答薛司徒

赫日輝輝耀太空  
樓船避暑暫掀篷  
山連荆楚雲無限  
江合瀟湘水未窮  
兵法不踰刑賞外  
邊塵須靜笑談中  
漢家平定論功次  
獨有蕭何功最豐

遠統王師為翦兇  
廣人何慮報邊烽  
已看諸將籌多算

更喜同寅肯協恭  
寶劔有芒曾指日  
輜車得路似追鋒  
三苗從此應懷化  
定見梯航九譯重

寄贈錢太守昕乃翁公達壽七十

春色平分五日前  
椿堂初度慶希年  
鸞書久拜山中相  
鶴髮真成地上仙  
膝遶錦袍顏似玉  
門迎珠履酒如泉  
宦遊不得逢嘉會  
遙祝遐齡定八千

永州飲別錢太守昕

江亭酌酒與君別  
宦況如君亦壯哉  
三郡蒼生懷異政

十年清議惜奇才却金人去難留住載米船回挽不來  
自古登賢重循吏會看高步上三台

夢萱堂為李總兵震題

建節登壇感慕深遊人堂北幾朝昏邯鄲適處常供饌  
蝴蝶迷時見倚門寸草哀心懷聖善五花封誥荷君恩  
安邊況是多勲業忠孝從今衍後昆

榮壽堂為王給事秉彝題

並享高年並受封人生至願遂兼隆固知教子收功速

也是為仁獲報豐相對錦衣人似玉齊添華髮面如童  
賢即名德推當代三錫應知進未窮

題岳陽樓二首

黃鶴齊雲總是樓獨登此處重回頭三湘溽暑坐來盡  
五嶺浮烟望處收范老憂懷圖報稱坡公愁思歎淹留  
丈夫欲取鯨鰲志擬把新蟾作釣鉤

樓外晴湖接紫冥偶來登眺眼偏明包含南服乾坤量  
吐納東流造化情五嶺只須常俯視三苗何必費徂征

凱還擬削君山石細刻皇威紀太平

襄毅文集卷六



欽定四庫全書

襄毅文集卷七

明 韓雍 撰

七言律詩

黃都憲叔高有總督南畿糧儲之命詩以送之  
歷轉華階三十年清才常荷聖明憐臺官新拜中丞上  
國計專司左輔前定使京師恒足用還期台鼎必喬遷  
東南民力今逾竭好為蒼生解倒懸

送朱文徵奉召還京師

命下炎荒起俊髦士林相慶喜聲高  
豈誇南國呈麟趾深賀中朝惜鳳毛  
青草瘴時催解纜紫薇香裏待揮毫  
江湖廊廟同心事休向玄都看碧桃

次韻寄趙總兵

別却旌旄纔幾日飄搖心緒似浮萍  
塵途幸我頭將白雲路從他眼未青  
自是思家嫌缺月可堪懷友嘆疎星  
非才不稱明時用擬向吳山築草亭

題控粵亭

成化二年冬宿重  
兵蒼梧構亭而作

高亭徙倚望西東兩鎮平分一水通  
諸將雄兵分節制  
百蠻殘孽任牢籠  
陽回陰谷窮厓內  
人在光天化日中  
翹首何堪倍惆悵  
思鄉懷國此心同

開府蒼梧構野亭  
旌麾駐此喜時寧  
全收百粵歸王化  
遙制諸蕃貢帝庭  
霜氣飛來江月白  
瘴烟消盡海天青  
丈夫有志堪輿內  
豈獨燕然可勒銘

征途

征途擾擾思悠悠三十年來不自由惡水險山終日見  
揚帆策馬幾時休何須當道回青眼甘儼匡時變黑頭  
聞道天驕猶未靖誰能談笑覓封侯

成化二年春王師平南夷而釋其降七月班師既斷  
藤峽偽降元兇侯鄭昂王牛兒如前誘黨復叛偷攻  
潯江不利遁過潯江之南移檄撫招執迷不從復偷  
劫北流容縣惡極罪大不可容迺於是歲十一月躬  
督諸將將兵犄角進勦甫三月已俘鄭昂至軍寘諸

重典牛兒亦授首斬其黨四千九百有奇歸所掠士  
民子女二千七百人潯梧高雷廉諸處地方復寧誠  
朝廷威德所致也師還駐蒼梧登控粵亭讀張方伯  
廷璽所作亭記見其紀此出師有舉網竭澤之言因  
竊嘆古之賢將相奉辭伐罪未嘗妄殺人以要功竭  
澤豈忍言然是賊也毒虐無極冥頑不悔與潮之鱷  
魚無異不盡戮則吾民之患不已古今人行事凡所  
以除患救民豈得已哉因賦比體詩一章書之亭中

明著聖天子命將出師滅賊之本末傳示來世

放生池裏盡昏昏鰐尾重搖苦噬吞  
觴網竟歸堯佐手投文虛負退之恩  
惡溪千里空流血澤國三軍厭食殮  
還理任公舊鈎釣相期收取北溟鯤

送同年泰和劉僉憲遊嶺南回

任雲南致仕還鄉

事與心遠久避名忽思南海看昇平  
遠乘范蠡扁舟興殊勝王猷雪夜情  
江上青山畱不住沙頭白鳥故相迎  
同年知己多零落執手離亭百感生

予整兵西巡辱中貴韋公携酒邀太監陳公王公同  
餞別行臺酒酣韋公探唐人早朝詩和韻見贈走筆  
立就詞致高遠觀者竦然起敬公復屬予和辭不獲  
已且重公之為人避權辭名有古人風因草草步韻  
併及之

近侍宮庭歲月長勤勞不覺鬢毛蒼甄陶多士傳經學  
密勿三朝署典章驚世有才詩句好立身無玷姓名香  
揮毫欲贊嚴遵美書法荒粗愧二王

石栗子詩有序

石栗子出廣之濱海深山中郡誌載其殼堅肉實如  
栗然廣之人止識其菓未常識其枝葉全柯之奇也  
鎮守太監陳公得之樵人轉致予清玩愛其奇異特  
甚平生所未見因賦一詩仍歸之置之座隅俟公會  
同覽云

異菓從來出海隅誰連枝葉置盤盂青鸞下抱纍垂卵  
翠葆中攢徑寸珠新摘檳榔形絕似舊嘗盧橘味全殊



時和萬物皆生瑞聊作歌詩頌有虞

送樂主事使兩廣還京

遠將恩命故鄉行旌節輝煌畫錦明  
大賚有功諸將喜受封無恙老親榮  
海天清氣三秋景驛路寒花萬里程  
才器如君定遭遇莫教虛負甲科名

戊子歲正月二日遊行臺東園偶成

昨夜東風底是忙東園吹醒百花香  
閒來緩步看生意靜裏微吟空斷腸  
半世浮名催老境一年春色又他鄉

吳山吳水依然好何日重開綠野堂

謝郭汝禎送雙桂且索其鄰家菊

少年曾折廣寒枝今荷林宗遠送遺萬斛天香生老圃  
兩株月影照清池竹松有約應同秀桃李無言祇自嗤  
聞道鄰家花更好可能分補滿東籬

謝郭汝文送竹

草堂新翠葑溪濱東郭賢人送此君  
顥顥深根繞易地亭亭高節便凌雲  
恍如鈴閣環兵衛不與蘭臺紀戰勲

白壁黃金何足比為題詩句謝殷勤

謝郭汝政送金柑

霜後黃金萬顆圓感君移置我堂前驚鳥遠彈明秋日  
照水繁星麗夜天克祭正堪供祖廟調羹尤可獻宮筵  
歲寒尚有層層葉畱與蘇耽治未痊

輓山陽趙處士通政參議伯顥從兄也

義濟功多寵渥新雲林泉石照簪紳修真已悟囊中訣  
觀化空遊物外神月旦評荒歌曉露山陽市罷哭秋旻

金史卷之七  
流芳有子能傳業還儼成名重顯親

籌邊亭為總督備倭都督董公世宏題

亭似西川節度樓元戎駐此思悠悠海天萬里勞多算  
水國頻年省近憂還儼遐方重建節何愁壯歲不封侯  
丈夫遭遇應圖報且莫逢人歎滯留

壽陳參政宗理母

婺女星光昨夜新滿堂賀客拜慈親金衣笑對黃花晚  
玉臉濃添綠酒春膝下喜看三品貴筵前飽飫八方珍

西池阿母桃將熟還擬持來慶此辰

白髮萱堂近九旬喜逢初度樂無垠  
橙黃橘綠秋將暮桂子蘭孫孝愈純  
明主有恩封誥重高年無恙賜袍新  
人間盛福應全備遐筭還期至大椿

成化己丑九月八日鄉友朱良德邀武功徐閣老暨  
祝大參維清劉僉憲廷美遊石湖諸公聯句成章良  
德懇求予和故倚韻和之

吳下衣冠集勝遊扁舟遊遍五湖秋未能執筆陪聯句

懶得逢人說運籌綠野文章傳在洛赤松心事棄封留  
虞歌趣我歸來興莫道非才尚黑頭

遊玄墓次趙行恕大參韻

景泰元年予出補外臺時所賦久遺其稿成化

五年重遊始收錄之

萬松逕裏寺門開故舊來遊喚我陪伴侶煙霞空有約  
品題風物愧無才寒光極目天連水秋氣橫空月滿臺  
海內湖山此奇絕何須更擬訪天台

重遊玄墓憶清長老

成化五年十二月

湖山如此世希有，況復秋高烟霧空。  
老我重遊尋舊景，入門何處覓清公。  
天開圖畫滄浪裏，人望樓臺錦繡中。  
苦憶歸來心未遂，羞看短棹駕長風。

瓊林宴歸圖為馮士定憲副賦

青年白皙占高科，宴罷瓊林喜若何。  
寶馬緩搖金壓轡，宮袍新賜碧香羅。  
人生得意光榮極，聖主深恩感激多。  
老我亦曾叨此遇，與君圖報莫蹉跎。

輓馮憲副乃尊

積慶生祥荷寵封豸袍烏帽晚雍雍可堪就養經南浦  
遽爾遊神到北峯老圃殘花荒舊業屋梁斜月照遺容  
賢郎哀慕情無極懶聽寒山曉寺鐘

送鴻臚沈寺丞還湖廣兼柬李總兵

湖南總帥真豪傑幕下賢賓得俊英倚馬萬言常草檄  
登壇三令助麾兵烏公定見分茅土溫造須當擁旆旌  
暫喜還鄉又還鎮煩君傳語謝高情

怡菊為錫山趙汝明題



冠冕雖榮懶折腰獨怡黃菊異蓬蒿花陪陶令歸時樂  
香比韓公晚節高三徑霜華添酒興一籬風味助詩毫  
清修更有傳芳處文彩翩翩見鳳毛

戴御史父母雙壽詩

行臺遊子憶雙親偕老鄉園過七旬養志已分天祿久  
推封將拜聖恩新光迎錦繡雲霞麗氣轉椿萱雨露均  
我為題詩祝遐筭江山風采幾千春

雪中招二三知己

南征五載未見雪今見江鄉臘雪飛老我不禁清興發  
故人何事賞心違包含梅柳春無迹照耀乾坤夜有輝  
預想來遊須秉燭瓊瑤還覩馬蹄歸

宦海虛舟為祝參政賦

祝與天全徐武功常遊太湖故末句併及

瑣闥薇垣三十年風波浩瀚一樓船萊公自嘆空橫渡  
傳相誰招共濟川勇退急流人莫及載歸明月世皆傳  
如今得伴鳴夷子放浪五湖為醉仙

謝錢伯康

儒醫神術冠東吳小弟頑孫受惠同兩世免勞憂強祿  
一門深是感幷幪塤麓協奏忻無恙簪笏相傳幸不窮  
白璧黃金未能謝為題詩句頌元功

壽朱玉雪四十八

正月十一日

東吳詩客滿華筵燈節初臨喜氣偏玉雪駐顏將半百  
蟠桃稱壽儼三千幾家公子能如此四海清名不偶然  
昨夜推窓卜遐筭老人星耀斗南天

贈陳醒菴孟賢

幾年不到醒菴宅今日來臨興自豪愧我交情成簡慢  
喜君詩思益清高古松歲晚凌千尺泰嶽秋空見一毫  
況有森森鳳毛在吟壇誰不讓風騷

成化己丑丁先人憂守制甫半載十二月二十日  
忽奉恩詔奪情起復進階右都御史總督兩廣軍  
務兼理巡撫上章辭免陞秩乞留終制不蒙俞允  
感而有作

苦塊餘生心已灰誰知恩命又來催不堪騎馬迎丹詔

安忍臨戎被墨纓孤子上章空有願聖皇注意莫能回  
滿懷無限君親感圖報惟應罄謏才

僉都御史吳公輿壁巡撫廣東甫一月朝廷以兩廣  
事不歸一仍命予總督兩廣軍務兼理巡撫輿壁得  
代回途次會別書此寓期望意

萍水相逢總宦遊我來君去兩悠悠喜君已釋千鈞負  
老我重添萬斛愁八座定知虛席待百蠻行見望風收  
江湖廊廟皆心事且放憂懷一勸酬

送陳序班友誠送安南使臣至廣回京

其人能琴

遠送邦臣下大荒只携書卷與琴囊  
回瞻北極歌商頌坐對南薰操越裳  
萬里皇風清海宇中原人物見星凰  
不堪相會俄相別夢繞飛龍在廟堂

次韻答鄉里諸耆舊

聽司藐藐視梅梅知命年來百病催  
利鎖名縲苦羈絆石田茅屋恐荒顛  
平蠻已喜干戈息辭老行看節鉞回  
却憶江湖衆仙友今辰又醉菊花杯

送齋詔行人劉公載

聖主覃恩及萬方，賢臣捧詔下窮荒。  
青年文采當時重，白壁聲名滿路香。  
衣錦重還傾壽酒，採詩遙去上封章。  
榮親報國平生事，高步行看入廟堂。

劉丈介公，家子貢士，節入廣校讐。文介集事竣還鄉，予出公榜。中年最少辱公，最知愛且重節之為人操履學識，綽有父風，故作詩壯其行。

學士文章世共誇，賢郎校正志尤嘉。  
魯魚亥豕分真跡，

玉珮瓊琚絕點瑕太素有傳終繼美小坡無忝克承家  
探花弱弟懷知己別爾何堪重嘆嗟

送李行人奉使靖江王府

奉使親藩閱兩秋清才偉望許誰儔  
斗南風俗勞動問嶺外山川足壯遊  
萬里青天倚長劍一輪明月載孤舟  
芳年定志真難得高步行看近冕旒

總鎮陳太監宅東有池故名鰐魚而鰐魚已絕歲庚寅冬漁人致嘉魚于公公弗忍烹育之池中因作亭



其上而以為名東吳韓子臨觀見物性之適作詩手  
書于亭中

清暇臨池結草廬鰐魚已去育嘉魚分來丙穴真相似  
投向濠梁樂自如南浦雲山增勝槩杜陵水竹稱幽居  
遐荒民物咸霑惠偉績應歸太史書

送方教授考廣西秋試事竣還韶

成化元年作

發解三山壓俊英甲科雖屈有香名久持教鐸賢才盛  
累典文衡藻鑑明霜落灘江書舫下花迎湏水菊杯傾

儒官最樂休嗟嘆遭遇行看荷寵榮

送楊叔簡尚寶冊封靖江府還朝

瘴霧纔消路不迷世卿持節望金閨  
驚人彩鳳爭先覩滿眼青山自品題  
文學不慚東里後光華還壯大江西  
忠宣忠彥平生志好繼家聲與古齊

總兵官平江伯陳公志堅鎮守兩廣之明年蠻夷咸服境土悉平迺于府第之中作軒三楹顏曰雙秀以軒後梧山雙嶺聯秀當軒故以為名東吳韓子往觀

而悅公得山之趣焉公索詩因題如左義見乎詞  
雙嶺秀拔倚軒居鬱鬱葱葱氣際殊並出雲陰作霖雨  
列為屏障鎮坤隅一時光價同增重萬古丹青總不渝  
幸喜和平遂清覽好輸忠蓋報唐虞

送戶部祁主事致和奉使便道還東莞省母復還  
京師

人曹郎佐非常士十載聲華海內欽奉使久持清白操  
寧親今遂孝思心天涯萬里同孤棹客裏何年再盞簪

金史卷之七  
康濟時艱丈夫事莫教虛負早為霖

近得文兒書報數年間置有田若干畝予竊自念平生宦拙未嘗有私積遺文惟南京常祿付文置產亦未必遽能得如此之多誠吾兒幹蠱才優節縮日用所致也昌黎先生嘗曰中世士大夫以官為家罷則無所於歸吾今有所歸志可遂矣喜甚賦詩美之且期望之

鄉井良田二十丘吾兒何力遽能求積金自媿元無計

幹蠱誰知儘有謀半世苦心天不負滿懷歸興我何憂  
老來惟是書香願願見成名慰白頭

王同節大理集古見贈倚韻奉答

清朝十載為廷尉播滿乾坤總好音執法不回游肇筆  
平反都是有功心進階已見腰犀近許國何妨鬢雪侵  
四海蒼生望康濟安危須仗廟謀深

平生不解干戈事承乏提兵著戰袍十載行邊親定亂  
有時望闕便登高擬裁畫錦堂前菊不詠玄都觀裏桃

自古為臣湏盡瘁敢因衰朽說賢勞

五鳳鳴陽為海虞章氏諸子題

鳴陽老鳳歸丹穴散出五雛千仞翔驚世音聲諧九奏  
麗天文采翊重光薛家昆弟終難並竇氏諸郎足可方  
世德不衰名益振堯庭行見進禎祥

項都憲蓋臣以詩見寄次韻奉答項時在襄陽總  
督軍務

奉命遙分閫外權一麾諸將喜爭先亂山開道威聲震

清野屯兵壘壁堅元惡幾多咸授首移民百萬盡歸田  
中原從此無遺患牟杜勳名浪在前

為惜崑岡火盡炎脇從都遣巨魁殲朝端清議咸推重  
海內蒼生益具瞻勛著旂常播中外恩覃湘漢及飛潛  
古來儒將知多少屈指誰如衆美兼

忽見新書楚鴈銜眼驚掣電耳英咸幾篇麗句頻三復  
千里高情盡一緘漫說霜華侵客鬢從教汗血濕征衫  
古來才大人多忌且悶精芒在劍函

輓張方伯父

幕賓謫後隨膺薦循吏功成即引年  
元亮歸來三徑在  
韋賢老去一經傳  
重封極品龍章煥  
載寫遺容鶴繡鮮  
早晚卽君還  
大拜寵光定  
許賁幽泉

輓姚僉憲父

風儀楚楚映修髯  
家法平生孝義兼  
大母久隆終世養  
佳兒今作外臺僉  
鄉評題品名踰重  
卽署推封寵載沾  
觀化一巡終不返  
史官有傳發幽潛



送錢學士

海珠尊酒惜分違  
宦跡如君賸有輝  
丹詔特增循吏秩  
錦袍重擁謫仙歸  
舟橫野渡明秋水  
劒倚長天耀夕輝  
聖主臨軒念耆舊  
調元行見入黃扉

漫嗟清世隱才能  
自古名高造物憎  
碧水丹山須暫樂  
玉堂金馬待重登  
一杯朝雨傷摩詰  
萬里秋風送季膺  
我欲從歸歸未得  
海天長望起鯤鵬

江行懷鄉里天全侗軒諸老偶成二首

西江北塞嶺南壩奔走風塵三十年勇退未能心已倦  
專征纔歇夢猶懸自緣衰體纏多病敢向明時話獨賢  
苦憶鄉園諸大老西風先泛五湖船

五湖烟景擅江東諸老懽遊有古風鳳吹鷗絃范成大  
筆床茶竈陸龜蒙全拋俗事水雲外盡付閑情詩酒中  
愧我求盟未能得海天長嘯思無窮

廣東行臺之西池有並頭蓮今夏大發比舊迥異  
詩以紀之

雙頭蓮萼世希見況是三頭相並開  
老我迂疎知偶爾  
廣人驚喜說奇哉  
皇威震曜清夷夏  
和氣薰蒸被草萊  
從此四靈應畢至  
欲歌盛美愧無才

送張方伯廷璽榮滿

廷璽與予同登正統壬戌進士第  
列官于朝未幾予  
巡撫江右廷璽出守吉安及予來兩廣  
廷璽復進廣  
東方伯相處有年甚知其德業之詳  
而廷璽以民情  
保留雖天官累薦入臺未偶茲十二載始得滿去膺

大拜無疑用贈鄙詩以申友道

瓊林宴會識英雄宦轍循行見事功江右聲華陳仲舉  
嶺南風望召康公趨朝定擬承新寵報國須當竭至忠  
獨我憂時無可効海天萬里思無窮

送甯方伯之浙江

方伯初以浙藩叅政陞憲使廣東甫踰年風紀大振  
而浙人懷惠不能置朝廷徇民願遂擢今官將來未  
可量故作詩以華其行兼致意云

嶺南廉察見才全坐席初溫秩又遷兩浙黎民懷惠澤  
九重錫命再旬宣英聲已喜蜚天下大拜還期近日邊  
海內于今尚多事莫教勲業愧前賢

贈鄉郡丘太守

吾鄉太守真豪傑節操文章有古風伯道清名傳海外  
樂天佳句滿吳東一麾撫字催科內千里謳歌德化中  
却恐邦人畱不住飛騰還建濟時功

慕萱堂為壻指揮謝瑛題

北堂慈母忽遊仙  
烏烏私情日夜懸  
罔極深恩無報日  
不禁哀淚動呼天  
空承世祿難為養  
每濕征袍祇自憐  
大孝從來非止此  
顯揚還擬繼前賢

送劉郎中寬仁審刑廣西回京

皇華十載進秋臺  
榮捧天書萬里來  
遊宦久諳當世務  
平反今顯濟時才  
旌搖庾嶺梅初放  
舟指灤河凍漸開  
老我臨邊思無限  
空將衰眼望蓬萊

七言古詩

壽郭母太孺人詩

吳淞江在吳城東江頭林木何青葱汾陽後人住林下  
高堂不與時人通堂中慈母登壽考八十春秋未為老  
簪中白髮千丈長鏡裏朱顏四時好降神之日近早秋  
藕花風輕殘暑收長筵廣席盛羅列馳峯鳳髓皆珍羞  
賢子賢孫綵衣舞玉樹芝蘭何楚楚座中賀客半詩人  
琳琅大振珠璣吐酒酣笑指婺女星共祝壽考還康寧  
瑤池蟠桃再結實遐筭直擬三千齡我與君家交最厚

南望鄉山重回首安得還鄉與壽筵歲歲年年祝慈壽  
七言排律

輓柳御史母孺人

聞道孺人髮已蒼母儀婦道總非常幽閑德比芝蘭秀  
貞靜心如鐵石剛孝養姑歡朝侍膳憂祈夫疾夜焚香  
恒隨令節供先祀每贊凶年發義倉道路行人資飲食  
閭閻獨舉婚喪撫存舅氏遺孤振表率姻家閭政良  
教子成名看衣繡抱孫傳業見飛黃清時錫命來丹闕



晚景承恩在畫堂冠簇翠珠雙鳳結袍明霞帔五雲章  
重重祿養來方厚杳杳仙遊去忽忙霜落宜男凋草色  
雲遮婺女暗星芒七旬高壽生無忝一世榮名沒有光  
新塚玉埋閑永夜穹碑山立對斜陽題銘太史多稱頌  
執紼鄉人重感傷我亦為詩揚盛美千秋萬歲永流芳  
五言絕句

題松贈馮公子泰

落落棟梁具陰陰冰雪姿曾經鉅眼識登用合乘時

六言絕句


次韻酬大司馬王公度四首

萬斛明珠遠寄漫言開府清新幾度焚香捧誦不禁光彩驚人

聖主龍飛九五嘉與天下更新軍國最為重事于今付托得人

仕路相知難得笑他白頭如新青眼始終垂顧如公能有幾人

奔走車塵馬足常時送舊迎新却有許多真樂湖山風景可人



襄毅文集卷七

欽定四庫全書

集部

襄毅文集卷八

九

詳校官庶吉士

臣陳若霖

中書

臣

劉源溥覆勘

總校官進士

臣

何思鈞

校對官待詔

臣

胡士震

謄錄監生

臣

朱上林

欽定四庫全書

襄毅文集卷八

明 韓雍 撰

七言絕句

洪都四景

南浦樓前日未暉  
白雲片片自飛飛  
河陽道路知何處  
悵望京華猶未歸

右南浦朝雲

門對西山暮捲簾雨來江上水痕添應須四海均沾足  
一洗蒼山九夏炎

右西山暮雨

湖水漫漫烟霧生人間萬籟寂無聲獨留一片秋空月  
照見波心徹底清

右東湖夜月

龍沙風起雪皚皚江上空山玉作堆最是霜臺寒氣肅  
喧啾百鳥不飛來

右龍沙飛雪

寄弋陽致政李少卿四首

其子玘  
為御史

天寵雖隆歸興濃  
耆英會裏得從容  
懸知一點丹心在  
清夢還飛到九重

蘭臺棘寺已功成  
歸卧烟霞咏太平  
多少世人空碌碌  
冒霜猶趁夜鐘行

鳳雛鳴日在高岡  
拂袖歸山百慮忘  
獨伴清風與明月  
新詩題遍午橋莊



三年不見謫仙人落月空梁入夢頻無限憂民憂國事  
何時尊酒細咨詢

題陳御史蒼厓舞鳳竹迺仲昭筆也

璦璦葆羽上青霄  
叫斷蒼梧路轉遙  
夜半天風弄明月  
不知何處正吹簫

送林黃門聰奉命代祀南海便道歸省和同寅王  
公度韻四首

朝陽鳴鳳瑞皇家  
四海蒼生覽德賒  
多少回天好封奏

人傳曾夢筆生花

一身已許帝王家奉使何嫌道路賒  
直以誠心將寵命祝融壇上奠松花

三山東畔是君家縹緲孤雲久望賒  
今喜承恩遂歸省錦袍宮釀壽萱花

忠臣憂國總忘家誰肯畱連歲月賒  
況是明君正延佇回軒莫待雪飛花

題王母圖壽陳湖陸母太孺人

堂北萱花秋正開  
清香秀色映霞杯  
白頭慈母多賢德  
福壽方如川水來

奉萱堂上綺筵開  
桂子蘭孫捧壽杯  
應是遐齡有千歲  
瑤池王母送桃來

題南昌徐布政義景齋卷

早歲携書上帝州  
登科司憲又承流  
老來歸向高齋卧  
景仰先賢總匹休

齋居瀟灑傍南州  
中有斯文第一流  
名遂功成身便退

不須題扁作三休

甘棠遺愛滿中州  
景慕前聞退急流  
多少世人空碌碌  
鐘鳴漏盡不知休

二載無暇至龍泉  
比至慰問父老吏  
循民安殊無一事  
皆上之賜也  
晚步中庭喜而有感  
口占一絕

王化漸摩久益深  
士風民俗總還淳  
山城駐節寂無事  
閑步月明看北辰

食鮓魚

官廩送來香稻米  
網船買得活鱖魚  
烹魚炊米空飽食  
補報無能愧逸居

湖口望孟誠李都憲不至

同榜同官意氣同  
幾年宦迹隔西東  
江頭久望無消息  
欲叩蒼蒼乞便風

雲谷八詠為鄉人袁仲玉題

醫傳董奉活人心  
濟物功成不受金  
雲谷年來春雨後  
新栽紅杏已成林

右杏林春雨

其人能醫

一逕深栽竹萬竿清風瀟灑逼人寒知君高節真相似  
莫厭頻頻歲晚看

右竹逕清風

石室香凝萬慮空製成新操付絲桐尋常莫歎知音少  
流水高山百世風

右石室鳴琴

靜裏乾坤玩古今一輪明月正天心光輝不但來雲谷

四海蒼生仰照臨

右天心玩月

學得新書逼二王揮毫常在墨池旁西風客棹曾經過  
吹出雲煙滿路香

右墨池揮翰

千峯萬壑六花晴着屐扶筇盡日行應似古人能放達  
獨將宇宙作佳城

右雪霽看山

其人能  
地理

坐倚梅窓俗客稀  
一編終日究精微  
吉凶消長何須問  
已悟先天造化機

右梅窓讀易

種得靈苗數十畦  
暖風吹動綠雲移  
頻鋤慎莫辭勞倦  
凋瘵蒼生久望醫

右藥圃鋤雲

題湖口上鍾岳

江上羣山翠欲流  
山腰江閣更清幽  
登臨一嘯畱題去



山遠江空誰唱酬

寄鄉人陳宗盛

雲樹迢迢隔故園與君何日叙寒暄  
春來慣作思鄉夢

幾度曾飛到雪軒

琴川才子人中傑慷慨風流信少雙  
別後相思不能歇  
幾時飛鴈到西江

思親堂為隣友唐戶侯題

汗馬勲勞衍後昆銀章世守祿常存  
空堂日日瞻遺像

一念難忘罔極恩

醉漁圖為蘇庠生惠榮題

滄海釣鰲鰲未得夢中心事肯忘機終持萬丈絲綸去  
直上虞廷補衮衣

謝南昌羅憲副麓惠春盤酬文山集

久欲乘閑訪故人無端風雨日陰陰于今却拜春盤惠  
翹首城南感愧深

不訪相知半載餘終堂情緒近何如應知讀禮今將遍

鄴架相資一卷書

次韻再答羅憲副六首

春到江南最可人  
梅花點點竹陰陰  
開來後樂亭中坐  
水滿方塘天影深

陰雲風埽淨無餘  
春滿江山畫不如  
第一樓頭開引望  
乾坤萬里混車書

久羨君才最絕人  
宦遊隨處有棠陰  
于今莫嘆遭逢晚  
海內蒼生屬望深

仲素家聲慶有餘。遙遙華胄信無如。青年擢第司風紀。  
多少勲勞汗簡書。

霏霏霽雨正愁人。忽見中天散積陰。寄語城南羅孝子。  
肩輿將到草堂深。

登郊訪友赴公餘。兩袖東風信所如。却恐行車怯泥濘。  
長鬚先致一緘書。

雨阻遊期答余同寅韻

花正紛紛草正菲。登山久約謝元暉。無情最是連朝雨。

阻我東風倒載歸

術士推康節前定數一生官跡皆符合不爽感嘆一

絕

先天數學信無乖推得從前萬事諧從此謀身不須問  
人生真有命安排

感春

柳條綠綠梅初葉麥隴青青菜已花春似鄉園又將半

東風吹恨滿天涯

三月三日夜風雨無聊對酒偶成

風雨蕭蕭三月三一身為客在江南  
愁來強對清尊坐  
燒盡銀缸猶未酣

夜酌池邊聞鐘偶成

客中懷抱不曾開  
偶對清尊坐綠苔  
星月滿天飛鳥定  
微風遙度晚鐘來

晚坐池亭

蝙蝠飛飛蚯蚓鳴  
坐來暝色滿池亭  
天涯未起

續字續字月

雲際踈穿點點星

三月晦日園人送王瓜有感二絕

春盡南州瓜亂生  
野人初送最關情  
燕京不比秦京暖  
二月終旬進未成

南浦春歸已摘瓜  
欲嘗新味却咨嗟  
故園濱海東風冷  
想得如今未着花

題仲昭為陳御史寫丹厓鳳尾竹

玉簫吹月綵鸞飛  
飛下江南覽德輝  
看舞天風上阿閣

九韶聲振九苞威

午日聞競渡歌

記得童年百不憂每逢佳節盼嬉遊  
如今為客不知節聞著歌聲添客愁

謝楊司寇惠家釀且求白鴨

公有君子亭

久客他鄉一病身蕭條客況有誰親  
故人遙贈江東酒對酒真如見故人

芳塘綠水浸青蒲粧點風光少白鳬  
君子亭邊最藩息



雙飛何日下洪都

午日風雨獨酌有感

多病年年客異鄉  
不堪風雨又端陽  
重恩堂上天倫慶  
應有愁人空斷腸

題鷗寓感寄楊司寇

終日沙鷗傍釣磯  
海翁易慮便高飛  
忘機本是生來性  
解得人心也有機

次韻答劉主事昌出史館有作見寄

青年才望有誰如  
常得承宣從屬車  
遙想玉堂春晝靜  
坐聽宮漏細細書

自歎

紅塵道上日紛紛  
欲效微勞答聖君  
寄語鄉山須待我  
宦情原薄似秋雲

喜信州作疊山先生書院訪其後以奉祀事敬賦  
二絕

國破家亡志不移  
文山心事似相期  
當年不落豺狼口

成敗于今未可知

文節忠魂死亦生千秋祀典有人承當年秦賈多時絕  
縱使綿綿蓋更稱

二月二十四日舟中觀歷偶知清明有感二絕

一年春在客中行擾擾誰知節序更偶坐蓬窓看新歷  
恰驚今日是清明

寒食家家祭掃忙不禁客淚欲霑裳故園邱隴千山隔  
不得隨親奠一觴

自遣

年少官高寵命頻推封兩度及雙親淒涼莫起賢勞歎  
遭遇如君有幾人

丙子夏洪吉袁瑞臨撫建信江饒南康十一郡大  
旱田租二百三十二萬勘有一百三十八萬成災  
封章上聞蒙恩俱賜蠲免憂民之懷稍舒口占一  
絕以識感激

十郡青苗總似焚不才無計埽妖氛蠲租有詔蒼生感

聖主寬仁邁漢文

菊莊八詠為海虞陳公賦題

柳塘春水漫花塢夕陽遲

方池柳蘸亂流深小障花留返照陰  
歌罷滄浪便垂釣相應拋盡利名心

漠漠水田飛白鷺陰陰夏木嘯黃鸝

萬頃白雲迷屬玉千章綠樹喚倉庚  
捲簾獨自草堂坐望入海天無限情

洗硯魚吞墨烹茶鶴避烟

逸少池邊魚不驚盧仝門外鶴長鳴菊庄風景依稀似  
何日重遊叙舊盟

就船買得魚偏美踏雪沽來酒倍香

海上雲寒飛六花鮮鱗佳釀不須賒擁爐終日自吟酌  
彷彿西湖處士家

寄程都憲彥實

故人作鎮在遼陽賸有聲名動帝鄉我忝相知重相憶

不堪回首海天長

坐撫東人未一年豐功偉績冠三邊相逢莫歎賢勞久  
廊廟行看拜寵宣

題扇寄陳宗盛

象骨金箋製度新緘封千里贈情深揮時不用遙相憶  
滿面清風即故人

寄陳宗盛

一壺春酒別閭關我自登途君自還馬上看雲重回首

不知何處是穿山

海天西畔是鄉關  
苦憶相知未得還  
莫道緘書空遠寄  
感君高義重於山

題菊寄張養正

菊下有竹石

黃葉滿空秋已殘  
石田秋菊自凌寒  
香心不許遊蜂採  
畱伴琅玕歲晚看

寒花采采傍雲根  
歲晚相依獨此君  
幾度書窓夜深坐  
滿天風露遞青芬



題鸚鵡鵲各一幅寄張致和

靈鳥能言避網羅  
山林深處占高柯  
雕盤縱有黃金粒  
不肯飛來奈爾何

巧語從來衆不堪  
叅軍門下被傷殘  
山林不用人調舌  
終日謔謔却自安

次韻答夏季爵大理二首

南牀叨接夏侯茵  
待漏頻年笑語親  
一別冬殘又春半  
薊門烟樹不堪人

病骨非堪着戰袍  
臨戎感奮却忘勞  
三邊近喜無烽火  
吟望皇都紫氣高

謝陳少卿惠藥

藥有紫霞杯  
浸酒而飲

任重才荒悴此心  
不堪衰病日侵尋  
感君惠我行囊藥  
一顆烏丸抵萬金

紫霞杯裏注瓊漿  
一夕纔吞藥味良  
有待微軀漸康復  
漫尋叔子拜神方

謝撫寧伯惠魚

塞北沙深水澤枯魚鰕風味四時無君家鮮鯉從何致  
堪比吳江一尺鱸

鮮鱗傳送直南金敢效公儀卻盛心便遣家僮為烹薦  
加餐知感故情深

秋日美峪至保安道中望居庸有感口占三絕  
居庸山北憶山南滿眼西風淚未乾道路相將三百里  
舉頭不得見長安

京華只隔一重山王事驅馳未得還却羨紅雲無定迹

也能飛去護天顏

路接家鄉兩日程  
臨風駐馬豈勝情  
翻憐不及桑乾水  
得向盧溝晝夜行

成化元年春予奉命偕趙總戎良佐提兵征兩廣四  
月望日師發南京次大勝關總戎以詩見贈次韻  
奉答

先聲已破鬼門關  
螻蟻殘生掌握間  
不信三苗不從化  
將軍今是趙平蠻

長江萬舸擁天兵  
父老壺漿候遠汀  
莫怪風聲震遐邇  
此行正欲埽羶腥

過江西次趙征夷韻題扇贈趙伯顯有感云耳

重過西江又十年  
江山風景尚依然  
門生故吏多騰達  
知有何人記二天

分手錢塘又一年  
此心遙憶甚茫然  
相逢贈爾清風柄  
莫畏黃堂盛暑天

趙總戎以校獵所得野獸見惠口占二絕奉謝

平原校獵試琱弓  
草內豺狼一掃空  
分惠庖人感深意  
從知絕藝屬英雄

射虎弓開百獸驚  
踉蹌就縛送中營  
元戎持此征蠻去  
巢穴行看指日平

去歲余與憲友趙伯顥同外補五月十有二日子至  
錢塘宿齋吳山而伯顥已先至因來叙話夜分始別  
忽忽一載矣茲予統師南征經伯顥之隣封伯顥亦  
來犒師亦以是日會於潯陽兩情相對喜而復感而

伯顯又亟欲別去予因口占三絕以贈

去年此日到錢塘同宿吳山夜話長  
今日相逢在萍水一樽相對兩茫茫

擁節重逢楚水濱因憐別久更情親  
煩君且莫論分手世上知心有幾人

自分江湖老此身不圖重拜聖恩新  
世間榮落遂巡事慎莫輕看失意人

廣東來報賊散承趙征夷惠琯弓鈎刀詩和且謝

肘懸金印事南征羽檄飛馳賊已平堪羨奇才出奇計  
從今不戰屈人兵

王師飛度嶺南來號令如山震若雷數萬狂蠻同日散  
將軍真是出群才

紫駝絨線紫琯弓神背烏號一樣同三箭天山看漸定  
非才真欲附英雄

新置鋼刀月樣彎崇山峻嶺便躋攀感君持贈征南去  
指日相從定北蠻



趙總兵詩賀東廣平次韻酬答二首

東廣民流命不堪荒原惟見樹  
旄旄謝君提出迷途去  
從此安眠又飽餐

讀書常羨馬征南  
淨埽南荒瘴與嵐  
今代重生趙充國  
聯芳留與後人談

師入桂林屢捷志喜

成化元年九月

旌旗纔指桂林途  
五發偏師五獻俘  
從此皇威清嶺海  
不勞民吏望來蘇

遊風洞

成化四年春南冠既平予自蒼梧移師駐桂林二月  
十有三日鎮守太監王公置酒邀予偕總戎都督歐  
公遊風洞酒既闌題此刻石以傳

萬里天風過此中百蠻烟瘴埽除空華陽白鹿徒多景  
爭及光明一竅功

為金仲和題夏太常竹

萬紫千紅照眼明一番風雨即飄零此君獨有冰霜節

風雨聲中色更青

高節亭亭一兩竿時人只解報平安  
滿林蒼雪歲華暮  
休作尋常桃李看

次徐武功韻題錢景寅扇

誰寫張騫萬里槎不同閑草與閑花  
高秋八月天風起  
直上銀河自不斜

張廷慎怡梅卷承錢學士命來索予題為賦三絕  
閭閻城外俗豪奢  
魏紫姚黃總闕誇  
何似張君愛清致

另開別墅種梅花

聞道君家好弟兄高樓日日宴簪纓  
憐君自得梅中趣應與梅花一樣清

別館梅開日自娛高鄰學士可曾俱  
驪龍暫卧華亭上好去多求照乘珠

晚香亭為葑關華元器題

卷有呂學士記

滿籬秋色過重陽曾上幽亭看晚香  
不用詩人更題品玉堂學士有文章

采采寒花十數叢  
蕭條時月傲霜風  
從知晚節非凡品  
撫卷題詩憶魏公

次韻酬沈陶菴四絕

高卧東林絕世紛  
昂昂野鶴在雞羣  
三吳人物多相重  
重爾能詩又好文

東吳詩客競紛紛  
沈老詩才自不羣  
聖主當天現鳴鳳  
朝陽光彩爛成文

連城白壁出藍田  
文采溫溫美且全  
堪羨陶菴好詩句

更多高義薄雲天

十畝家園萬頃田  
稻梁蔬果四時全  
有時放棹濯纓去  
水滿平湖月滿天

舟中看沈陶菴所作奉寄

吳東林下有詩豪  
落筆光芒萬丈高  
昨檢行囊看墨跡  
滿江烟雨起波濤

壽傅澤民醫師

簫鼓聲中勸酒頻  
南鄰仙老慶初辰  
知君自有長生術

不用詩人祝大椿

顏如丹渥鬢如霜真得仙家却老方  
昨夜東林有星宿  
孤南一點倍光芒

劉廷美僉憲為鄉人魏古作湖山圖徐武功題詩  
其上魏復求予作為賦一絕

詩畫精神二美全滿堂風雨起雲烟  
更憐彷彿五湖口  
欲學鴟夷放釣船

東園偶成

三十年來立要津  
虛名惹得世人嗔  
獨慚知遇恩難報  
夜夜東林望北辰

百粵兵收鬢已斑  
逢人那敢說平蠻  
非才只可填邱壑  
何日天邊得放還

少年平步上青天  
蹤跡希奇每自嫌  
今喜衰遲將退步  
靜思物理始怡然

人生至願我皆全  
況復相將半百年  
多少同儕不如意  
令人念念感蒼天



東林散步宦情微懶與時人較是非好鳥飛來又飛去  
相應疑我未忘機

謁芳洲陳先生墓

先生平生薦賢一惟至公門下稱為得人至南陽李  
原德相繼執政士君子之自重者多不得進而乞哀  
奔競之徒皆相率用清議為之不平焉既而出其門  
者多以賂敗英廟知其為人將圖顯黜而賓天矣使  
假以數月原德必不免于殞厥身而欲優優以考終

也得乎芳洲延公是未伸憤憤以沒天理之報果安  
在哉謁拜之餘徒增悲感遂作小詩以志之

玉華山下石蒼蒼感德門生奠一觴邱壠雖荒清節在  
回頭却笑李南陽

南陽何幸得全歸翻使芳洲卒布衣昭報從來有遲速  
漫將成敗論天機

過梅關

二月二十九日也先是霖雨至日  
偶晴夾道好鳥和鳴喜而有作

紅梅關上度雙旌天意分明特放晴山鳥飛翔心亦喜

好音不住向人鳴

去年二月出梅關今歲承恩又復還碌碌塵途三十載  
不知何日遂投閒

答王大理

孤臣久客瘴江邊惟是相知肯見憐更有多情王大理  
時時遙寄錦雲篇

雲路同遊三十春晚年更覺故情親海天萬里頻垂念  
道義分明似古人

南昌彭節自為書生至驛官從予撫西江平南蠻効  
勞簿書有年矣嘉其勤慎嘗兩薦之天官徇例待其  
赴部始為擢用茲辭予往焉恐其墮厥志與詩勉之  
勤勞幕下幾經秋又捲行裝上帝州薦爾未成真有命  
逢人莫歎久淹留

七旬慈母豫章城衣錦歸寧喜不勝想是猶存顯揚願  
莫教功利累名稱

離江舟中撥悶

桂林至蒼梧江也

六月灘江上桂林炎風暑雨思難禁也知衰體宜調養  
可奈君恩責望深

砢泮湍流幾百灣冥濛雲樹萬重山樓船獨坐羽書靜  
漫檢戎韜消日閑

辛卯歲年五十鬚鬢有變白者

百粵平來見二毛七年猶未脫征袍聖明倚託非常重  
敢對時人話獨勞

憂勞萬狀與誰論一點丹心祇自捫白盡鬚毛何足惜

只慚衰朽未酬恩

八月六日發蒼梧之桂林大霧蔽江

喧天鼓吹引麾幢黑霧濛濛蔽大江自信真誠能辟瘴  
家僮不用閉船窓

人說瘴鄉投竄地我遊七載幸無虞此心不負朝廷托  
應有神明護賤軀

桂江鯽魚甚巨且美食之有作

桂江霜鯽長如許絕似松江一尺鱸鯽美終非故鄉物

臨風長嘯憶三吳

桂江舟行見各山畬田廣開蠻夷殘孽持兵供役  
夾道拜迎視往年處處益多喜而有作

蠻夷流劫幾經年飽食何嘗肯力田今日自知勤穡事  
畬田處處滿山顛

夾江山獠數年前日夜藏蹤截過船今仗皇威已心服  
持兵供役滿江邊

辦事官黃漢斌從予有年茲乞歸省母口占四絕

以華其行

黃生從我久勞勤  
況是平生志不羣  
忽憶慈親之歸省  
楚雲湘水思紛紛

青油幕下効勞多  
累薦無成奈若何  
遲速從來皆有命  
莫教初志便蹉跎

我冠博帶遠還鄉  
綠酒黃花壽北堂  
滿袖西風畫遊處  
石牛山色倍生光

寧親展墓望鄉廬  
我又封章達帝居  
昭代用人遺逸少



重來從事莫躊躇

寄硯與宗玉白尚書

買得端溪硯一方獻歸司馬助文房揮毫濡墨紬思處  
多少仁恩覆大荒

次韻酬徐武功先生

高卧東山夢正酣相親無計策歸驂交情不改忘年舊  
珠玉時時下嶺南

賜還軒冕自南蠻海南常時憶謝安相業終期駕伊呂

父名今已並歐韓

東吳南越斗牛分  
夜夜遙瞻憶相君  
萬里何時遂初願  
君為龍去我為雲

海內人龍繫我思  
我思未見忽成詩  
台司有台今將至  
且莫臨風讀楚詞

次韻答祝參政維清

紫微堂上解機權  
歸臥江湖一棹烟  
想與陶朱醉吟處  
世間萬事兩茫然

削平南越欲辭權歸向東吳避瘴烟翻咲當時寶車騎  
空將名字勒燕然

寄林錦衣索所許畫菜

寫生寫到忘形處野菜園蔬信手塗記得相逢曾見許  
鴈銜何日到蒼梧

輓蔣宗韶鄉友

坦軒野叟非常士長賦才名鄉里推孝義更多題不盡  
陳旰已有史官碑

哲人有道忽長逝身後綿綿福慶重伯氏承家真克肖  
仲兮還擬拜推封

平生湖海多交友此老高風獨擅名萬里題詩重傷感  
屋梁殘月不勝情

甲午十月二日夜風寒擁爐達旦不寐偶見新月  
口占一絕書于減度橋頭

滿林黃葉肅霜天挑盡殘燈未得眠無限心中隱憂事  
又看新月掛天邊

重九日華高士宅賞菊次其舊韻

得時行道郭汾陽臣節無虧名亦香  
老我于今復何幸  
功成名遂解金章

當時脫穎少年叢  
意氣真成有古風  
今喜休官漸衰老  
都將世事付天公

詞

滿庭芳

有序

恭審總兵官平江伯陳公志堅  
胄出簪纓業承韜畧抱

非凡之遠志挺出類之雄才肅將明命已平百粵蠻夷  
簡在宸衷復總三軍漕運光價日高于閭外歡聲雷動  
于淮南克繼家聲足當國計是用修詞為賀慶衍恭襄  
賢追莊敏天生一代忠良早膺封拜承命下南荒儘展  
六韜三畧收蠻夷盡數歸王守家法清貧如故四海姓  
名香聖明憂國計簡司漕運特授金章總水兵百萬作  
鎮淮陽定績先公勲業足京儲永固封疆還擬進六師  
大帥丹悃佐吾皇

袁毅文集卷八